

Pisortani Digitalimik Allakkerinermut ilanngunnermit inunnik pisussaajunnaarsitsineq pillugu Namminersorlutik Oqartussat nalunaarutaat nr. 34, 23. september 2020-meersoq

Pisortani Digitalimik Allakkerineq pillugu Inatsisartut inatsisaat nr. 14, 8. juni 2017-imeersumi § 10, imm. 1 aamma 2, § 11, imm. 2 aamma § 17, imm. 2 naapertorlugit aalajangersarneqarput:

Kapitali 1

Atuuffia il. il.

§ 1. Kapitali 2-mi malittarisassat malillugit inuit ataasiakkaat Pisortani Digitalimik Allakkerinermut ilanngunnissamut pisussaajunnaarsinneqarsinnaapput.

Imm. 2. Kommunitum takkunermi inuit ataasiakkaat inuup allat allakkanik atuarsinnaanerani pisinnaatitsineq nalunaarummi atuuffeqartinneqarpoq, tak. § 10.

Imm. 3. Inuup toqukkut qimagunnerani Pisortani Digitalimik Allakkerinerup imarisaasa nungutissinnaaneri nalunaarummi atuuffeqartinneqarpoq.

Kapitali 2

Pisortani Digitalimik Allakkerinermut inuit ataasiakkaat ilanngunnerinit pisussaajunnaarsitsineq

Pisussaajunnaarsitsinissamut piunasaqaatit

§ 2. Inuk Pisortani Digitalimik Allakkerinermut ilanngunnissamut pisussaajunnaarsinneqarsinnaavoq pineqartup pisussaajunnaarsinneqarnissamut tunngavilersuutit ikinnerpaamik tullinnguuttuni ataatsimi ilaalluni uppersaanermigut atsiorsimaguni:

- 1) 1. januar 1951 sioqqullugu inunngorsimalluni.
- 2) Eqqarsarsinnaassutsikkut imaluunniit timikkut piginnaasat annikillisimasut kingunerisaanillu Pisortani Digitalimik Allakkerinermik atuisinnaajunnaarsimalluni.
- 3) Angerlarsimaffimmi, sumiiffimmi imaluunniit suliffimmi qarasaasiamut imaluunniit elektronikkikkut atortorissaarutinit allanut internetimut attaveqartitsisumut periarfissaqanngikkuni.
- 4) Nuussimasutut imaluunniit Kalaallit Nunaanniit allanut nuussimasutut Inuit qitiusumik nalunaarsorsimaffianni (CPR) taamatut nalunaarsorsimaguni.
- 5) Pineqartoq Kalaallit Nunaanni aalajangersimasumik najugaqartutut imaluunniit aalajangersimasumik

tamaaniittutut nalunaarsorsimajunnaarsimaguni, tak. Inuit qitiusumik nalunaarsorsimaffiat pillugu nalunaarummi § 6, imm. 1 aamma 2, kisianni Kalaallit Nunaanni aalajangersimasumik najugaqanngitsutut nalunaarsorsimaguni, tak. Inuit qitiusumik nalunaarsorsimaffiat pillugu nalunaarummi § 6, imm. 4.

6) Pineqartoq oqaatsitigut kalaallisoorsinnaannginnermigut, danskisoorsinnaannginnermigut tuluttoorsinnaannginnermigullu Pisortani Digitalimiik Allakkerinermik atuinissamut ajornakusoortitsisumik aporfegaruni.

7) Pineqartup atsiornermik digitaliusumik pissarsinissaq ajornakusoortikkuniuk, assersuutigalugu danskit aallartitaqarfiani NemID-mik tunniussiffiusinnaasumut ungasissumi nunani allamiinneq pequtaalluni.

8) Pineqartup najugaqarfia internetimut attaveqarfiunngippat.

Pisussaajunnaarsinneqarnissamik qinnuteqarneq

§ 3. Pisussaajunnaarsinneqarnissamik qinnuteqarusuttoq kommunimut inuit allattorsimaffiat malillugu nalunaarsorsimaffigisaminut imaluunniit kingullermik nalunaarsorsimaffigisimasaminut saaffiginnissuteqassaaq.

Imm. 2. Inuk inuit aqqinik allattorsimaffiani kommunit agguataarnerisa avataaniittoq allakkamik imaluunniit sullissivik.gl-ikkut digitalimik nassiussinikkut Digitalimik Sullissinermut Aqutsisoqarfimmut saaffiginnissaaq, tak. § 4.

Imm. 3. Qinnuteqaat ilanngussaq 1-imi pisussaajunnaarsinneqarnissamik qinnuteqaammut immersugassatut takutinneqartumi tunniunneqassaaq.

Imm. 4. Inuit pisussaajunnaarsinneqarnissamik qinnuteqarnermut atatillugu kinaassutsimut uppernarsaat assitalik atuuttoq takutissavaat, taamaattoq tak. imm. 5. Kinaassutsimut uppernarsaatit atuuttut makkuupput:

1) Biilernermut allagartaq nunami EU/EØS-imi, Kalaallit Nunaanni imaluunniit Savalimmiumi atulersinneqarsimasoq.

2) Pas-i inuup pineqartup nunagisaani pisortatut oqartussaasuni atulersinneqarsimasoq.

3) Forsvaret-ip kinaassutsimut uppernarsaataa Danmarkimi atulersinneqarsimasoq.

4) NATO-pas-i.

5) Politiit kinaassutsimut uppernarsaataat Danmarkimi atulersinneqarsimasoq.

6) Najugaqarnissamik akuersissut imaluunniit najugaqarnissamik allagartaq assitalik Danmarkimi atulersinneqarsimasoq.

7) Danskit aningaaseriviani kinaassutsimut uppernarsaataat.

8) Nuna tamakkerlugu kinaassutsimut uppernarsaat assitalik pineqartup nunaani pisortatut oqartussaaffeqarfinni atulersinneqarsimasoq, aamma nunani Schengenimi angalanermi uppernarsaatit atorneqarsinnaasoq.

Imm. 5. Inuup pisussaajunnaarsinneqarnissamik qinnuteqartup normua kinaassutsimut uppernarsaatit assimi ilaanngippat, kinaassutsimut uppernarsaatip assitallip saniatigut kinaassutsimut uppernarsaat alla inuup normuanik takussutissartalik takutinneqassaaq.

Imm. 6. Kinaassutsimut uppersarsaat assitalik takutissinnaanngikkaanni, kinaassutsimut uppersarsaatit assigiinngitsut marluk nassarneqassapput, aappaani pineqartup inuttut normua takuneqarsinnaassalluni. Kinaassutsimut uppersarsaat tassaasinnaavoq:

- 1) Najugaqarnermut uppersarsaat.
- 2) Kuisinnermut allagartaq imaluunniit atinut uppersarsaat.
- 3) Akileraartarnermut Aqutsisoqarfimmiit ukiumut ukiumoortumik nalunaarusiaq kingulleq imaluunniit siumoortumik nalunaarusiaq.
- 4) Pisortanit ikiorsiissutinik pisartagaqarnermut uppersarsaat nutaannginneq qaammatini pingasuni pisoqaassuseqassaaq.

Pisinnaatitsilluni pisussaajunnaarsinneqarnissamik qinnuteqarneq

§ 4. Inuk pineqartoq pisussaajunnaarsitsinermit qinnuteqaammut immersugassatut ilanngussaq 1-imi takutinneqartumi inuup pisussaajunnaarsitsinermit (pisinnaatitsisup) qinnuteqartoq sinnerlugu pisussaajunnaarsitsinermit pisinnaatinneqarnermigut qinnuteqaateqarsinnaavoq. Immersugassaq pisinnaatitsisumit atsiorneqarsimassaaq, matumani pisinnaatitsinermit uppersarsaat immersugassamiittoq pisinnaatitsisup atsiorsimassavaattaaq.

Imm. 2. Pisinnaatinneqartoq pisinnaatitsisup CPR-imi najugaqartutut nalunaarsorsimaffigisaani imaluunniit nalunaarsorsimaffigisimasaani kingullermi kommunimut takkunermigut pisussaajunnaarsitsinermit qinnuteqaat tunniutissavaa.

Imm. 3. Pisinnaatinneqartoq kinaassutsimut uppersarsaammik takutitsissaaq, tak. § 3, imm. 4-6, kiisalu pisinnaatitsisoq sinnerlugu pisinnaatinneqarnini uppersarsaat atsiorsimasaq nassassallugu. Pisussaajunnaarsinneqarnissamut noqqaassummut immersuiffissaq ilanngussaq 1-imi takuneqarsinnaasutut pisinnaatitsineq tunniunneqassaaq. Inatsisit naapertorlugit ingerlatsivik pisinnaatinneqarsimaguni, pisinnaatinneqarluni takkuttooq inatsisit naapertorlugit ingerlatsivimmeersuunini uppersarsassavaa, assersuutigalugu inatsisit naapertorlugit ingerlatsivimmuut isissutini atorlugu.

Imm. 4. Pisussaajunnaarsitsinermit qinnuteqarneq sullissivik.gl-ikkut digitalimik pisinnaavoq. Qinnuteqarneq digitalimik pissappat, qinnuteqartitsisup nammineq digitalimik atsiornini atorlugu kinaassutsini uppersarsassavaa. Qinnuteqartitsisoq inatsisit naapertorlugit ingerlatsiviuppat, inatsisit naapertorlugit ingerlatsiviup sulisumi digitalimik atsiornera atorlugu kinaassutsimik uppersarsaasoqassaaq.

Imm. 5. Inuk inuunermi tamaat nukillaangalersimanini imaluunniit assingisaanik inissisimalersimanini pequtugalugu nammineerluni takkussinnaanngikkuni aamma pisinnaatitsisinnaanngikkuni, pisussaajunnaarsitsinermit uppersarsaammik atsiornertaqanngitsumik pisussaajunnaarsitsinermit kommunalbestyrelsi aalajangiisinnaavoq. Aalajangiineq pineqartup inissisimaneranik kommunip ilisimasaqarfignera tunngavigalugu aalajangiisoqassaaq.

Imm. 6. Inuk pinerluttulerinermi isumaginnittoqarfiup inissiisarfiisa ilaaniinnera pequtugalugu takkussinnaanngikkuni aamma pisinnaatitsisinnaanngikkuni, Kalaallit Nunaanni pinerluttulerinermi isumaginnittoqarfik inuk sinnerlugu pisussaajunnaarsitsinermit qinnuteqarsinnaavoq, tak. § 2.

Qinnuteqaat kommunalbestyrelsip innersuussineratigut digitaliusumik imaluunniit allakkatigut kommunimut pineqartup inuit allattorsimaffiat malillugu nalunaarsorsimaffigisaanut imaluunniit kingullermik nalunaarsorsimaffigisimasaanut tunniunneqassaaq.

Pisussaajunnaarsitsineq pillugu aalajangiineq

§ 5. Qinnuteqaatit tunniunneqartoq kinaassutsimullu uppersaatit takutinneqartoq tungavigalugu pisussaajunnaarsitsinermit kommunalbestyrelsi aamma Digitalimik Sullissinermit Aqutsisoqarfik aalajangiissapput, tak. § 3, imm. 1 aamma 2.

Imm. 2. Aalajangiinissaq pitinnagu sukumiisumik naliliisoqareerneratigut inuup Pisortani Digitalimik Allakkerinermit allagarsiassani pillugit pisussaajunnaarsitsinissaq pinnagu tigusinnaaniassammagit kommunalbestyrelsi aamma Digitalimik Sullissinermit Aqutsisoqarfik ikiuullutillu ilitersuissapput, tak. § 3, imm. 1 aamma 2.

Imm. 3. Pisussaajunnaarsitsineq Pisortani Digitalimik Allakkerinermit nalunaarsorneqassaaq.

Imm. 4. Pisussaajunnaarsitsinermit piumasaqaatit naammassineqanngippata, pisussaajunnaarsitsinermit qinnuteqaatip itigartitsissutigineqarnera qinnuteqartumut nalunaarutigineqassaaq.

Imm. 5. Imm. 4 malillugu aalajangiinerit allaffissornikkut oqartussaqaarfinnut allanut ingerlateqqinneqarsinnaanngillat.

§ 6. Pisussaajunnaarsitsineq ullormit nalunaarsuiffimmit piffissalerneqanngitsumik atuutissaaq.

Kapitali 3

Allagarsiat ammarneqanngitsut

§ 7. Inuup digitalimik allakkeriviani allagarsiat ammarneqanngitsut annertussusaat kommunalbestyrelsimut paasissutissiissutigeqqusinnaavai. Pineqartup imaluunniit pisinnaatinneqartup ammartuinermit najuunnissaq piumasarisinnaavaa. Pineqartup kommunalbestyrelsip pisinnaatinneqarnissaa kissaatiginngippagu digitalimik allakkerivimmi allagarsiat ammarneqanngitsut kommunalbestyrelsimut paasissutissiissutigineqarsinnaanngillat.

Imm. 2. Inuup imaluunniit taassuma pisinnaatitaata taamaattoqassasoq kissaatigippagu, allagarsiat ammarneqanngitsut pineqartup inuit allattorsimaffiat malillugu najugaanut nassiunneqassasut kommunalbestyrelsip isumagissavaa.

Imm. 3. Digitalimik Sullissinermit Aqutsisoqarfik imm. 1-imi aamma 2-mi aalajangersarneqartutut kommunip agguataarneqarnerata avataani inuit aqqisa allattorsimaffianni inunnut allagarsiat ammarneqanngitsut pillugit isumagissavaat.

§ 8. Inuk pisussaajunnaarsinneqarsimappat imaluunniit Pisortani Digitalimik Allakkerinermut allatigut ilanngussimannngippat, nassiussisup allagarsiat pappialanngorlugit imaluunniit allatigut pineqartumut nassiunneqarnissai isumagissavai.

Kapitali 4

Inunnik Pisortani Digitalimik Allakkerinermut ilanngussimannngitsunik nammineq piumassutsimik ilanngunneq

§ 9. Pisortani Digitalimik Allakkerinermut pinngitsoorani ilanngunnissamut pisussaajunnaarsinneqartoq Pisortani Digitalimik Allakkerinermut atsiorneq digitaliusoq atorlugu iseriarluni nammineq piumassutsimik ilanngunnermigut ilanngussinnaavoq.

Imm. 2. Inuup ilanngunnera imm. 1 malillugu pisussaajunnaarsitsinneqarnera atorunnaarsinneqassaaq.

Imm. 3. Pineqartup nammineq piumassutsimik ilanngunnermi kingorna pisussaajunnaarsinneqarnissamik kissaateqaleruni, pisussaajunnaarsitsinermut qinnuteqaat nutaaq nassiuteqqissavaa. Qinnuteqaat tunniunneqassaaq taavalu §§ 2-6-imi malittarisassat malillugit suliarineqassalluni.

Kapitali 5

Inuup allap allakkanik atuarsinnaaneramik pisinnaatitsineq

§ 10. Inuk Pisortani Digitalimik Allakkerinermut ilanngussimasut inuup inuit allattorsimaffianni nalunaarsorsimaneq malillugu kommunerisaanut imaluunniit kingullermik kommunerisaanut saaffiginnissuteqarnikkut inuit imaluunniit inatsisit naapertorlugit ingerlatsiviit Pisortani Digitalimik Allakkerinermut imaluunniit tassanngaanniit nassiunneqartut atuarsinnaaneramik akuersisinnaapput.

Imm. 2. Inuit kommunip agguataarneqarnerisa avataaniittut Pisortani Digitalimik Allakkerinermut ilanngussimasut Digitalimik Sullissinermut Aqutsisoqarfimmut saaffiginnissuteqarnermikkut Pisortani Digitalimik Allakkerinermi pineqartumut aamma pineqartumit allakkanik nassiussanik inummut allamut imaluunniit inatsisit naapertorlugit ingerlatsivinnut atuarsinnaanermik pisinnaatitsisnaapput.

Imm. 3. Inuup atuarsinnaanermut akuerisaasup § 3-mi allaqqasut malillugit kinaassutsimut uppersaammik takutitsissaaq. Atuarsinnaanermik akuerineqartup aqqa aamma inuttut normua imaluunniit inatsisit naapertorlugit ingerlatsiviup aqqa aamma CVR-normua pineqartup

paasissutissiissutigissava.

Imm. 4. Inuup pisinnaatitsinermigut kommunimut ornigutsitsilluni orniguttoq imaluunniit inatsisit naapertorlugit ingerlatsivimmeersoq atuarsinnaanermut akuerisinnaavaa. Takkuttup pisinnaatinneqarnini kiisalu kinaassutsimut uppersaasatini § 3-mi allaqqasut malillugit takutissavai. Inatsisit naapertorlugit ingerlatsivik pisinnaatinneqarsimaguni, pisinnaatinneqarluni takkuttoq inatsisit naapertorlugit ingerlatsivimmeersuunini uppersaassavaa, inatsisit naapertorlugit ingerlatsivimmut isissutini atorlugu. Pisinnaatitsineq ilanngussa 2-mi immersugassamut innersuunneqartumi atuarsinnaanermut akuerineqarneq pillugu tunniunneqarsinnaavoq. Pisinnaatitsinermut uppersaasatit takutinneqartup atorneqarnera pinnagu kommunalbestyrelsi allatut takutitsilluni pisinnaatitsineq akuerisinnaavaa.

Imm. 5. Atuarsinnaanermut akuersissut imm. 1 malillugu inunnut imaluunniit inatsisit naapertorlugit ingerlatsivinnut assigiinngitsunut tunniunneqarsinnaavoq. Taamaattoq atuarsinnaanermut akuersissutit amerlanerpaamik 10-t nalunaarsorneqarsinnaapput.

Imm. 6. Atuarsinnaanermut akuersissut Pisortani Digitalimik Allakkerinermi elektronikkimik nalunaarsorneqassaaq atuutissaarlu utertinneqarnissaata imaluunniit peerneqarnissaata tungaanut tak. imm. 6.

Imm. 7. Atuarsinnaanermut akuersissummik tunniussisoq, tak. imm. 1, kommunimut takkulluni qaqugukkulluunniit akuersissut taanna utertissinnaavaa kinaassutsimullu uppersaasat takutissallugu § 3-mi allaqqasut naapertorlugit, imaluunniit pineqartup nammineerluni Pisortani Digitalimik Allakkerinermut iseriarluni atsiorneq digitaliusoq atorlugu atuarsinnaanermut akuersissut peersinnaallugu. Inuup allap takkulluni pisinnaatinneqarnerminullu akuersissummik kiisalu kinaassutsimut uppersaammik § 3-mi allaqqasut naapertorlugit takutitsilluni atuarsinnaanermut akuersissut utertissinnaavaa. Utertitsineq Pisortani Digitalimik Allakkerinermi elektronikkikkut nalunaarsorneqassaaq.

Imm. 8. Atuarsinnaanermut akuersissummik tunineqartup digitalimik allakkerinermi atuarsinnaallunilu aaqquissuussinnaavoq, matumani digitalimik mappit ilanngullugit.

Imm. 9. Atuarsinnaanermut akuersissummik tunineqartup atuarsinnaanermut akuersissut pineqartumut tunniunneqartoq naapertorlugu peersinnaavaa.

Imm. 10. Atuarsinnaanermut akuersissut inatsisit naapertorlugit ingerlatsivinnut tunniunneqartoq imaapportaaq, inatsisit naapertorlugit ingerlatsiviup toqqassavaa atuarsinnaanermut akuersissut inatsisit naapertorlugit ingerlatsivimmi inummut imaluunniit inunnut Pisortani Digitalimik Allakkerinermi digitalimik allakkerivimmik akuerisaasutut atuisinnaasunut tamanut tunniutissanerlugu.

Imm. 11. Inuup atuarsinnaanermut akuersissut allamut tunniussimagaluarpaguluunniit, digitalimik allakkerineq atuarsinnaanermut akuersissummik tunniussisumut apuussimasutut isigineqassaaq. Inuup pineqartup digitalimik allakkerinermi atuarsinnaanermut akuersissut kimut tunniutissanerlugu nammineq akisussaaffigivaa.

Kapitali 6

Pisortani Digitalimik Allakkerinermi allagarsianik piiaaneq

§ 11. Pisortani Digitalimik Allakkerinermi allagarsiat inummut takkuttut pineqartumit taamaallaat peerneqarsinnaapput.

Imm. 2. §§ 2-5imi malittarisassat malillugit Pisortani Digitalimik Allakkerinermut ilanngunnermit pisussaajunnaarsitsineq inuup digitalimik allakkerinerani allagarsianik paaasoqassanngilaq.

Imm. 3. Inuup toqukkut qimagunnerani inuup digitalimik allakkerinerani allagarsiat imarisaasut namminerisamik ukiut 5-t qaangiuppata peerneqassapput, taamaattoq tak. imm. 4.

Imm. 4. Inuup imaluunniit inatsisit naapertorlugit ingerlatsiviup assersuutigalugu pigisanik agguaassisarnermut eqqartuussivikkut uppersarsinnaappagu toqukkut qimagunnerup kingorna toqusup pii sinnerlugit iliuseqarsinnaalluni, kingusinnerusukkut imm. 3-mi aalajangersarneqartut saniatigut paaanissamut noqqaassuteqarsinnaavoq.

Imm. 5. Kingusinnerusukkut paaanissamut noqqaassuteqarneq www.sullissivik.gl-ikkut imaluunniit Digitalimik Sullissinermut Aqutsisoqarfimmut allakkatigut allagaqarnikkut saqqummiunneqassaaq. Uppersarsaat imm. 4-mi taaneqartoq ilanngullugu nassiunneqassaaq.

Kapitali 7

Atulersinneqarnera

§ 12. Nalunaarut atuutilerpoq tamanut saqqummiunneqarnerata aqaguani.

Imm. 2. Pisortani Digitalimik Allakkerinermut pinngitsoorani ilanngunneq atuutilerpoq 1. januar 2021.

§ 13. Pisussaajunnaarsitsinermut qinnuteqaat aamma atuarsinnaanermut qinnuteqaat atuutilerneraniit tunniunneqarsinnaapput, tak. § 12, imm. 1

Imm. 2. Pisortani Digitalimik Allakkerinermut pinngitsoorani ilanngunnissamut atuutilernissaa sioqqullugu pisussaajunnaarsitsinermut qinnuteqarneq, tak. § 12, imm. 2, pissaaq

1) ulloq 1. januar 2021-mi 30-t inorlugit ukiulinnut ulloq 31. oktober 2020-mi,

2) ulloq 1. januar 2021-mi 50-it inorlugit ukiulinnut ulloq 30. november 2020-mi aamma

3) ulloq 1. januar 2021-mi 70-it inorlugit ukiulinnut ulloq 31. december 2020-mi.

Namminersorlutik Oqartussat, ulloq 23. September 2020

Karl Frederik Danielsen

